

## لاتبرر

و انا باذل الاسباب .. والله لو انها جرام  
لو ان الهقاوي تصيب و احيان تخطيني  
ببمناي و عقالي و بشماغي البسام  
سريت الدروب و طيب حظي يباريني  
و لا منةً اللي لا انطلب كن عليه اعدام  
تحق المنايا خير من منته فيني  
تغاضيت عن كل شي ما همني .. مادام  
أميز محبيني و كاشف معاديني  
رفيقي ليا من ضاق قلبي كما الصمام  
ينظم مرور الدم داخل شراييني  
و عدوي في بطنه غل كنه حقل الغمام  
جعل تقصر الخطوات مابينه و بيني  
نوايا قلوب الناس مثل البحر .. لطام  
و لا داري بموجه على وين يرميني  
تمر المواقف عاتيه .. ما تمر انسام  
عسى ربي يثبت على الارض رجليني

بدر نايف الكبيح

صدوف الزمن تبري بالإدراك بري اقلام  
الى ان تصاغر بعض الكبار في عيني  
محتهم مثل ما تمحي التوبه الآثام  
يا ربي تقوي فيني السوازع الديني  
قناعاتي بهالعام ماهي بمثل العام ،  
من اغراني من العام ما عاد يغريني  
لقيت الحياه دروس .. و لا الخيال اوهام  
يسافر بي بكيفي و أحيان يغويني  
انا ودي ان الوقت بيدي مثل الافلام  
اعيد الشريط بكل لحظه تسليني  
لكنه بدين اللي عن اللي خلق مانام  
إله(ن) كتب الاقدار و الرزق بسنييني  
اذا مروا استبسال او مروا استرحام  
اذا شاء يبلاني و اذا شاء ينجيني  
سجد وجهي لعزته إذلال و استسلام  
و لا غيره إليا ضقت أرفع له ايديني  
يا ربي وانا في وسط راسي كثير احلام  
وانت الوحيد اللي عن الناس تغنيني

## من الصفر احبه

غرامه ربي بداخلي وانتشر بالحيل  
من الصفر حبه في حشى النفس منغربي  
انا في نظر عيني حشى ماسمعت القيل  
اهو حاضري ومستقبلي وباكري وامسي  
جحدني مثل مايجدد الكافر التنزيل  
فجعني مثل فجع الهواجيس للمسي  
جرحني مثل جرح الثرى من غزير السيل  
رمانى مثل مايرمى بالي اللبسي  
محبة ثمان سنين ضاعت بلا تحصيل  
تصدق ختمها صاحبي يوم قال : انسي ؟  
ختمها بصمت لاوداع ولا تعليل  
ولا زال جرحه داخل الروح مايبسي  
تسرب طواري صاحبي مع ظلام الليل  
تحرم عليه لامست الخلق ما أمسي  
أويلاه عقب الحب والخير والتدليل  
اهل الدموع وخاطري ضايق عمسي  
على ادناة شي ازعل وعلى ادناة شي اعيل  
اويلاه عقب اليوم ياخفها نفسي  
ياويلي عليه اليوم ويل يجر الويل  
عقب صاحبي كن القدر معلن حبسي  
فلا عدت اميز ياعرب بالعدل والميل  
خياله يتابعني من الصبح لين امسي

عابرة سبيل

